

Chhuah fan: Oct., 1984

JULY, 2016

RAMTHAR



I.T.I. Veng Kohhran Blak In

Home Mission & Cachar Tiangram Missionary Retreat (May 26 -29, 2016) nelhna hmun

SERMON

RUALBANLOTE HMANGAIH.....phêk 3 - 8

**RAMTHAR ASSOCIATION CHANCHIN BU THLA KIP CHHUAK
EDITORIAL BOARD 2016 - 2018**

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pl C. Lalrampárl	9436190803 (M)
News Editor	: Pu Lalblakénga Fanal	9436366234 (M)
Clr. Manager	: Pu Lalawmnakima Hmar	8575178109 (M)
Publisher	: Rev. K. Lalrinmawia	9485140409 (M)

Member-te

Rev. H. Lalrinmawia	: Synod Moderator
Upa H. Ronghaka	: Synod Secretary (Sr.)
Rev. B. Sangthanga	: Executive Secy., I/c Mission
Rev. Lalremuata Ralte	: BEC Member
Upa H. Thangmawizuala	: BEC Member

Thu chhuah tûr nei chuan Email - ramtharchanchinbu@gmail.com-ah emaw lehlam chauhah ziaikin Editor emaw Manager, Ramthar Chanchin bu, Synod Office, Aizawl, Mizoram (India) hnénah emaw thawn tûr a ni e.

Ramthar Chanchinbua thu chhuah hi a ziaiktu mawhphurhna a ni.

KUM KHAT LÁK MAN - ₹ 50/-

A CHHÜNGA THU AWMTE

- | | |
|----------------------------------|---------|
| 1. Editor thukhawchâng | - 1 |
| 2. Keimahni | - 2 |
| 3. Sermon | - 3-8 |
| 4. BUHHMUN AṬANGIN: | - 9-23 |
| (1) Tripura Gospel Team Prachar | |
| (2) Kum nga hnuah Marigaon-ah... | |
| (3) Tuithumhnar hlimthla | |
| 5. Ramthar Feh | - 24-32 |



PATHIAN HNĒNA THILPĒK LEH CHANCHIN ṬHA HRIL

Khawwêla lo piang chhuak tu mah hi pian hlîma 'rawmawl' pakhat tē pawh rawn hum chhuak sawi tūr an la awm lo. Joban, "Ka nu pum ata saruakin ka lo chhuak a, saruak vékin ka kîr leh dawn a nih hi," (Job 1:21) tia a sawi tidiktu a ni. Paula pawhin, "Khawwêlah hian eng mah kan luhpui si lo va, eng mah kan chhuahpui thei bawk hek lo," (1 Tim 6:7) a ti bawk. Mihringin a dawn loh chu eng thil mah rawn chhuahpui sawi tūr a nei lo – ṭah mai loh chu.

Pathian hmangaihna hretute chuan pêk ve an châk ṭhin. Melkisedeka te, Abrahama te, Jakoba te, Lal Davida te, khawchhak mi fing te, Zakaia te pawhin an pe. Sâm ziaktu chuan, "Ka chung a thiltih ṭhat zawng zawng avàng hian LALPA chu eng nge ka pêk ve thung ang?" a ti ruai mai a ni. Pathian hnĒna thilpĕk hi amah kan hmangaihna lantirna a ni a. Hmangaih lovin a pêk theih a; pe lo erawh chuan a hmangaih theih loh. "Pe rawh u; tichuan, pêkin in awm ang," Lal Isuan a ti. Vâna ro khâwl khâwmna a ni.

Mi tam tak ṭawngṭai thu hi tawi tēin khai khâwm ila, "Aw Lalpa, mal min sâwm rawh," ti kan ang ber em aw? Didakhe IV.5 chuan thilpĕk chungchang hetiangin a sawi, "Thilpĕk dawn nâna bán char mi leh, pêk ve dawna bán tawm mi i ni tūr a ni lo," tiin. Oswald J. Smith-a chuan, "I sum hmuh dân azirin pe rawh; chuti lo chuan, i pêk dân azirin Pathianin i sum hmuh dân a relsak ang che," a ti. Pastor Saiaithanga chuan, "Keimah ka inpe a, thilpĕk hranpa a ngai lo,' ti chu inpe lo se a ṭha zâwk," a ti.

Sawma pakhat (1/10) hi Pathian ta, dân hnuai a awmte pawhin an pêk ngei tūra tih a ni a; khawngaihna huna awmte tán phei chuan thimâkmawh a ni. Pe lo chuan Pathian a rûksak a ni. Pathian Ram sawma pakhat Pathian Ram lpa ṭhen dân tūr Synod-in min zirtîr dân chu 5:3:2 kalphung zuiin a ni a. Chumi awmzia chu Pathiam ram thilpĕk i pêk zât kha ₹ 1,000/- ni ta se, hetiang a ṭhen tūr hi tihna a ni:

Thla	Pathian ram	Ramthar	Tualchung	TOTAL
Jan	500/-	300/-	200/-	1,000/-

Ramthar leh Tualchung belh khâwm kha Pathian ram nèn a inzât tūr tihna a ni. Thawktu Châwmna, Building, Rethei Pual, etc. hi Pathian Ram lpa telh tūr a ni lo. Kum 2014-2015 leh 2015-2016 Financial Year-ahte kan Synod Budget kan phâk lo nasa hle a. Ramtharah pawh kumin hian cheng nuai 472 zetin kan phâk lo va; Chanchin Ṭha hrilna lamah ṭhahnem kan ngaih ṭulzia min hrilh hre tharah ngaiin ṭan i la sauh sauh ang u. Thilpĕk hi kal chhuak ve thei lote tán Chanchin Ṭha hrila kan pên ve theihna kawng a ni si a.

K E I M A H N I**† TUARPUINA:**

1) Pi Lalbiakluangi S/N, Siliguri nu, Pi Lalrinsiami (79), Mamit Hmunsam Veng chuan ni 23.05.2016 khán Thisen sang avângin chatuan ram min pansan.

2) Pastor F.H. Kapkhuma i/c Pakur Bial, Jharkhand pa, Upa H. Sanghluna (76), Tualcheng khua chu ni 25.05.2016 khán Pum ná avângin a thi.

3) Pi Lalthlangfeli E/T, Karimganj, Barak Area pa, Pu Lunghnema (58), Serzawl chu ni 30.05.2016 khán motor chesualah telin Darlawn Damdawi In panpui a nih hnuin a thi.

4) Pu H. Lalhuliana Evangelist, Changlang, Arunachal 'E' pa, Pu Lalsangluaia (86), Lengpui khua chuan Cancer avângin ni 1.06.2016 khán chatuan ram min pansan bawk.

† MISSIONARY RETREAT HMANG: Home Mission, Cachar Tlangram & Masihi Sangati-a thawkte pualin ni 26-29 May, 2016 chhúngin ITI Veng Biak Inah Missionary Retreat hman a ni. Missionary (leh an kawppui) in-report zât hi 1,121 an ni. Hlim tak leh tuang takin hun hman a ni.

† REFRESHER COURSE LEH PASTOR ORIENTATION NEIH THU : Ni 24 April - 26 May, 2016 khán Missionary Training College (MTC)-ah Missionary Refresher Course neih a ni a, Missionary 28-in he course hi an hman.

Ni 4-13 May, 2016 khán MTC-ah vêk hian Mission Field-a Pastor dah tharte pualin Pastor Orientation neih a ni a, Pastor 16 an tel a ni.



SERMON 'RUALBANLOTE' HMANGAIH

Cháng thlan: Matt. 4:23-25; Lk. 4:16-19

Rev. Lalrinthara, F/ S
Arunachal 'E'

1. Rualbanlo Awmzia: 'Rualbanlote' (Person with Disabilities/Differently Abled Person) hi *Medical leh Social Model* tiin an thliar ðhin. PWD (Person with Disabilities) Act 1995-in a sawi dân chuan – Zaa 40 aia tlêm lo chak lohna an nei tih Medical lam hotuten an chian (verified) hnuah chauh 'Rualbanlote' anga ngaih an ni. NSSO (National Sample Survey Organization), India chuan, "Rualbanlote' chu mihring pangngai tih theih ang ti thei ve lote hi an ni," a ti.

Statistics hi lâk thiam a harsa hle. 2001 leh 2011 chhiar dân (criteria) a inang lo va; chuvàngin Data mumal sawi a har a, hmasâwn dân teh theih a ni rih chiah lo. Eng pawh ni sela, inchhiarna aţanga thil Chiang tak sawi theih kan neih chu:

Δ 'Rualbanlote' zingaa zaa 98-in zirna pangngai (*formal education*) an dawng lo.

Δ Khawpuiyah aiin thingtlangah 'Rualbanlo' an tam zâwk.

Δ 'Rualbanlote' zingah mipa aiin hmeichhia an tam zâwk.

2. India ram hi 'Rualbanlote' tána hmun hrehawm a ni:

Khawvêl ram hrang hrang thlirin 'Rualbanlote' enkawl leh hmuh dânah India ram hi ram hnufual ber páwl kan ni àwm e. A chhan chi hrang hrang a awm:

Δ A bulpui ber chu Hinduism vâng a ni. Pian nawn (Karma-Samsara) rinna leh inzirtirna hian nghawng tam tak a nei a,

an rin dân chuan vawiina ‘Rualbanlote’ hi an khawvêl hmasa hman khawloh rah chhuah (*karmic cycle*) nia an ngaih avàngin Rualban lohna hi Pathian anchhiaah an ngai a. An chhúngte pawhin an zahpui êm êm a; khawtlángin a endawng (*stigmatized*) a, an thinhrik a ni ber àwm e.

Δ India ram hi ‘Rualbanlote’ mipat hmeichhiatna hman sualpui (*sexual abuse*) hluarna hmun bera sawi fo a ni. Thiamthu sawi ve thei lo, sawi ve thiam lo, sawi thei lo (ṭawngtheilo), thlavàng hauhtu nei ve lote an nih avàngin ‘Rualbanlo’ hmeichhiate hian pawngsual an tâwk nasa hle.

Δ Ni 19 May, 2014 khán India rama ‘Rualbanlote’ (PWD) hotupa ber, Chief Commissioner, Prasanna Kumar, Aizawl a lo zin khán kan Sawrkar a rawn sáwt nasa hle! A sawi zawng zawng kha dik vek lo pawh ni se (lo hrilh chhâwngtuten an zir lo thei a) Sawrkar pawhin ‘Rualbanlote’ chanvo pêk tâwk loh a nei

a ni mai thei a, inènletna tûr a nei a ni mai thei.

3. Isua leh ‘Rualbanlote’:

John 9:2 ah “Rabbi, mitdel saa a pian hi tuin nge thil tisial, he mi hian nge a nu leh pa-in?” tiin ‘Rualbanlote’ laka Isua rilru putzia hre duhin an rawn zâwt a. Isuan Judate ngaih dân deng dawt khawpin a chhâng a – Rualban lohna hi sual avànga lo awm a nih lohzia Chiang takin a sawi lang a, Mosia Dâna zirtirna ṭha tak takte dik lo taka an hrilhfiah ṭhin kha na takin a dem a ni.

Deut 32:39 – “*Ka tihlum ṭhin a, ka tinung bawk ṭhin a; ka hliam ṭhin a, ka tidam bawk ṭhin,*” tih te leh Lev 21:6 (‘Rualbanlote’ tána thilhlan hlan a khapna thu) te hi ṭanchhanah hmangin ‘Rualbanlote’ hi Pathian anchhedawng ang hiala ngaihna an nei a, an rilru put hmang dik lo tak chu Isuan a dodâl a ni. Hêng lai thu aṭang ngawt pawh hian ‘Rualbanlote’ laka Isua rilru puthmang hi Chiang takin a hriat theih a, zir zui

peihthe tân hetiang hian tawi tê tê-in târ lang ila:

1) *Nazareth Manifesto (Luka 4:18, 19)*: Isuan rawngbâwlna a ÷an phata Nazareth-a a Mission kalhmang tùr a sawi a÷ang khân Isua hi hnehchhiaha awmte, mi retheite leh ‘Rualbanlote’ lam÷ang a nihzia Chiang takin a hriat theih a ni.

2) *Ruai Ropui (Lk 14:21ff; Mt 22:1-10)*

3) *Mitdel Bartimaia (Mt 20:29-34; Mk 10:46ff)*: Lei leh vãn Lalber kal lai tiding chawt theitu chu ‘Rualbanlote’ hi an ni.

4) *Hmeichhe pakhat, kum 12 chhúng thi put (Lk 8:43f; Mt 9; Mk 5)*: Isua thiltihtheihna dek che khawp rinna neitu chu he hmeichhe Rualbanlonu hi a ni.

Hêng lo pawh hi tam tak a awm.

4. Kohhran leh ‘Rualbanlote’: Kohhran chanchinah hian ‘Rualbanlote’ tâna

rawngbâwlna hi a langsar lo hle! Kristian theology tam ber hi Rualbanhote (abled people) tâna chher a ni fur àwm e. Chuvàngin hetiang zâwng hian kan Kohhran hi i han thlir puat puat teh ang.

1) Kohhran hi Krista taksa, mi tin, hnam tin, chi tin huapzo a nih ang takin kan kalpui tak zet em?

2) Kan Biak In building leh a chhúng kan rem dân, a vël kan thuan dân te, Biak In hmun kan zawn dânah te hian ‘Rualbanlote’ kan ngaihtuah thleng pha em? Kan inkhâwmna furniture leh dawhsan (platform) leh pulpit panna step te en hian ‘Rualbanlote’ a hnar nghal êm chu a ni lo ang a; mahse, Building Committee ngaihtuahna hi chu a thleng pha lo tal chu a ni ngei ang.

3) Bengchhêtte puala *earphone* a hranpa liau liaua dahna Kohhran hi Mizoramah hian a la tlêm hlein ka ring. Bengngawngte puala *sermon* inkhâwm pheih hi chu nei kan la awm lo

mai thei a ni! Hemi atána Evangelist a hranpa ngata ruai Kohhran kan ramah hian kan awm ang em aw? TNT (Thutak Nunpuitute Team) rawngbàwlna kan thlahthlam ngam miah lohna chhan ber nia lang chu an *Pangpar Huan* hi a ni. Isua làwm zâwng tak rawngbàwlna a ni miao mai a, khawvêl pawhin a ngaihlu hle a ni.

5. Mizote leh ‘Rualbanlote’: Mizo Upate khân mi-anglo chhawncchaih leh an tih dân zir te kha an duh lo hle òthin a; mahse, an thu kan awih chiah lo pawh a ni mai thei (?), mi-anglo bàwl ching tak khua te pawh an awm lehzêl àwm asin! Khaw pakhata mi pangngai phâk mang lo anga an en òthin kha, khaw danga a pemnaah chuan VC member-a an lo thlan tâk nawlh pawh a awm a ni ang. Mi-angl tûr mang mang pawh mi-anglova chhuah hrât tak khua pawh an awm a ni mai thei. Mizoram chhúnga khawthlang hmun pakhatah pheih chuan kebai pakhat kal dân an inzirsiak a, amah ber

pawh telin pathumna a ni pha hrâm a ni àwm e! He thil hi thlan lai kotlang tî tî pheih chu a ni a, a tak tak niin an sawi tlat a ni.

Mizote thurochhiahah mi-anglo hmuhsit hi an duh lo viau nia a lan laiin kan khawtlângah khân mi-anglote an lo chêp hle a ni tih a hriat theih. Nupui pasal zawn dânah hnam fimkhur tak, an thlahtute chena chhui òthin kan ni a. Chuta kan ngaih pawimawh êm êm òthin chu – an chhúngkuaah rilru buai, pianphunga rualbanlo, kutkem nei an awm em, tih hi kan inchhui dân a ni fo. Mi-anglo leh ‘rualbanlote’ leh naupangte hi huang khatah kan dah òthin. Hêng avàng hian anchhia ang deuh thawa ngaiin kan zahpui a, rip-ah khungin inlêng òtha kan neihin kan thukru/thup bo va. Zalenna nun kan siamsak lo va, an khawvêl hi hremhmunah kan chantír òthin.

Kum za chuang kristian kan nih hnu pawh hian ‘Rualbanlote’ laka kan rilru puthmang hi a la

inthlâk hlei thei lo. An thih niin an ruang chungah kan inhmuchhuak thar a, inchnîr ngawih ngawihin kan ÷ap a. Mahse, phêngphehlepa khua a tlai zo hman tawh si ÷hin. Mizo Upain 'fahrahte lamah khawtlâng a ÷ang' an tih hi a dik hle tih hi chu kan hrechiang vek lawi a.

6. 'Rualbanlote' hi Isua hmangaihte an ni: 'Rualbanlote' hi Krista aiawhtu, Isua pangpâr, Isua hmangaih fate, Pathian malsâwmna thlentute an ni. Pawn lama inchei nah tak, Biak In leh a vêla ringtu ÷ha tak; mahni In chhûnga pianpui unau 'Rualbanlote' tán chuan thlahrang ang thaw thánga hlauhawm pawh a awm theih ang.

Kohhran pawh hian he lamah hian ÷an lâkna tùr leh Sawrkar leh tlawmngai páwlte kut nghâk lova chêtna tùr kan ngah hle ang. Kan Kohhranin Tarte Inkawmhlina ni 5 May, 2016-ah a hawng ÷an ta a (*Kohhran ÷henkhat, hetiang inkawmhlina lo kalpui*

mék an awm bawk), a lâwmawm hle. Hma sâwn hreta 'Rualbanlote' puala Centre ÷ha tak kan buatsaih hun a nghah-hlelhawm hle.

Rev. Vanlalzuatan khawthlang lam hmun pakhat, a zinnaa 'Mi â chhúngkua' (*ama ÷awngkam takin*) a tlawh ÷uma a thil tawn a sawi hian ngaih-tuahna a tithui khawp mai. He mite chhúngkua hi an khawngaihthlâk khawp mai, fa pasarih an nei a, hmeichhia pakhat tih loh chu mi-anglo vek an ni a, zun leh êk pawh thliar hrang thei lo khawpa chhah deuh vek an ni. Chhûng mite enkawl chu an nupa ni tin hna a ni ringawt mai a. An inkawmnaa an pa ber thusawi hian rilru a khawih khawp mai, "*Hetianga fa kan neih avàng hian Pathian lakah kan la vui ngai lo, vui ahnehin hetiang enkawl tùra Pathianin keini nupa tehlu min ring tâwk hi kan lâwm zâwk êm êm a ni,*" tiin. CDPO duhsakna azârah an fanu pakhat ni tin ₹ 100/200 hlawhin an chhawr a, a

thawh chhuah chu an chhúngkaw intunnunna awmchhun a ni; an rethei àwm hle mai!

Kan òhianpain a thil tawn a sawi ka la hriat reng chu - “Zàn khat chu kutdawh pakhat kan inah a lo lút hlawl mai a. Amah chu pa lianpui, bal rimchhe zet, bawrchhaur leh òawp tak mai a ni a. Ka nupuiin a hmuhin a hlau a, a ten bawh a, buhfai no hnih pein chhuak thuai tùrin kan ti a. A chhuah dawnin a awmna leh a chaw eina hmun te ka zâwt a. Aizawl Veng pakhat (an veng hmíng thup) chhúnga cham rih, a kalna hmuna chaw eia an sàwm dân azira riak nghal mai òhin niin a chhang a. Tichuan, thim tham hnuaiah kan inthlah liam ta a. Zàn ka mut dawnin ka ngaihtuah zui rauh rauh a. Ka zíng òawngòai inkhâwm bángin kan òhenaum khawvengte hnênah a hma zàna kutdawh chanchinte ka zâwt kual a. Kan in bul

chiaha mi, kutdawhpain a kaltlang ngei ngeina tùrte pawh ka zâwt a; mahse, tu mahin an lo hmu ve lo va. A chanchin ka chhui zèl a, kan veng chhúnga chutiang mi an awm tih hria reng an lo awm ta lo! Ka ngaih a òha lo tulh tulh a; ka rilruah hian Chiang êm êmin, **‘ISUA A NI’** tih hi a lo lút ta thut mai a. Mangang leh inhhîr takin Pathian hnênah ngaihdam ka díl ta a. Khami zàna thil thleng kha vawiin thleng hian ka mitthlaah a la chám reng a ni,” a ti.

Hebrai lekhawhawna kan hmuh angin, “... òhenkhatten hre lovin Vantírhkohte an lo thleng si a,” (Heb. 13:2) tih ang khán, hêng kan unau ‘Rualbanlote’ hi Vàn lam aiawh, malsàwmna thlentu tùra rawn tírhte an ni a. Keni lahin hre lovin kan lo khêngbet òhin. Hêng mite ber chungka kan tih hi kan Lal Isua chungka ti kan ni. A hmangaih fate hi i hmangaihpuvei ang u.

Matthai 25:45 - Tin, ani chuan an hnenah, ‘Tih tak meuhvin ka hrilh a che u. Heng mi te berte zinga mi pakhat chungka in ti lo chu ka chungka ti lo in ni,’ tiin a la chhang a.

BUHHMUN AṬANGIN TRIPURA GOSPEL TĒAM PRACHAR

*H.S. Lalmuanpuii, Evangelist
Sibbari, Tuingoi Bial*

Tripura Gospel Teamte a hnathawh ropui tak min hmuhtir ṭhin avàngin Pathian hming chu fakin awm rawh se!

Tripura Gospel Team hi kumin aṭangin Pastor Bial 16 aṭangin Evangelist 10 zêl thlang chhuakin thla tin kan inthlâk ta a. Keini pawh ni 3 – 23 May, 2016 chhúng feh chhuak tûra ruat zíngah kan tel ve a. Kohhran enkawl lai leh Attached Church dangte kan neih avàngin hman lo leh buai bawk nèn a phurawm duh fahran lo hle mai. Mahse Lalpan ṭul a lo ti hle a lo ni.

Ni 3 May-ah chuan mahni hmun ṭheuh aṭangin kan Prachar-na tûr hmun, Ganganagar Pastor Bial chu kan pan khâwm ta sang sang a. Team Member tûrte hi la inhre ngai lote kan ni a. Gospel Team atâna ruat kan nih kan hriat aṭangin miten ‘Malaria tamna a ni a, fimkhur tûr aw’ min ti

hlawm a. Nia, Ganganagar Pastor Bial hi thawktu hmasate Malaria avànga an lo insun tawhna hmun a ni tlat a ni. Mahse Pathian hnathawh ropui tak hmu dáwnin kan inhre tlat a, kan phur ru hle lawi si a ni.

CHAMPARAI KHUAAH: Tlai dár 3 dáwnah kan hma lâkna hmasa ber tûr Champarai khua kan thleng a. Biak In sak thar, la luah loh ni àwm takah kan han invawm lût a. A ṭhenin thingtuah kan zawng a; tui chawi leh rawngbáwl tûr kan insiam a. Khua-in min thimhnan tâk avàngin a zan khatna chu *programme* eng mah buatsaih theih a ni ta lo. Chaw te ei khamin mutna kan han siam a. Biak In chhúngah ngei mai kan han mu ta a. Khua a lumin

a thaw-ipik-thlâk tak zet a, kan mutui dâwn ta maw tihah thlipui leh ruahpui rawn thawkin kan mutna a rawn theh a. Kan ðhu pawr fap hlawm a, mut ngaihna a awm ta si lo va, khua kan nghâk vâw ta a ni.

Hetah hian Biala thawktute hma lâkna avângin Kristian sawm chuang lai chu an lo awm tawh a. Mahse enkawltu awm ta lo chu an la inkhâwm thei lo va; an khawngaihthlâk hle a ni.

Champarai-a kan awm chhúng hian khuain min bumro nasa hle a. *Film* pawh kan chhuah hleithei lo a, a pawl tak zet a ni. A zan thumnaah kan chhuah thei ta hlauh a. Mahse, vânduaithlâk takin Ningani zânah kan Projector a kàng chhe leh ta tlat mai. Mipui khati zât rawn kal khâwm, beisei taka min thlirtute kha an va lainatawm êm! Tihngaihna dang a awm ta lo. Kan lám ta ngawt a; kan han lám mi lo êm êm hlawm khawp a. Thusawi a zo va, kan báng ta ngawt a.

Ruah a súr duh hle a, *Current* a awm lo nghal zêl bawk nèn. *Current* hmanga *supply* tui dawng an ni si. Inbualna tùr haihchhama khaw lum tak hnuaia kan han hawihai chu duh anga *programme* kal tluang thei si lo nèn, bei a dawng rum rum mai. Mahse Lalpan ruahmanna fel tak a lo nei a; he hmunah hian Lalpan ringthar panga (*nula, tlangval leh putar*) min pe a ni. Kha hmun kha hrehawm angreng viau mah se kan va han hlim si êm!

He khuaah vêk hian thinlung khawih tak thil pakhat kan tawng a. Nula kum 20 pawh la tling lo, ringtu ni tawh chu Kristian a nih hnu lawkah na takin a damlo va. A mumangah Kristian a nih vânga damlo a ni tih hrilhtu a neih avângin Hindu-ah a lêt leh a lo ni a. Pathianni zingah an inah kan va kal a, inkhâwm tùrin kan sáwm a. A inkhâwm chuan a nuin a hnawt chhuak dâwn tih a sawi a; mahse inkhâwm ðan hmain a rawn thleng ve ta tlat mai.

Zàn a lo ni a, Ambassa Bialin *Projector* min hawhtír leh hlauh mai a; chumi hmang chuan Isua tuarna Film kan chhuah a. Kan kiangah mittui tling piau chungin a rawn ding a, a nuin a thawmhnaw zawng zawng theh chhuakin a rawn hnawt chhuak a lo ni a. An inah mi pali kan kal nghal a, a nu chu kan han kawm a. Mahse a lungawi thei tlat lo mai a. “A thih pawhin min rawn tibuai suh u,” tiin kan kutah min pe a, kan riahpui ta a. Pathianin kan ÷awngtáina a chháng a, kan haw dáwnah erawh chuan a lo pawm leh thei ta a ni. Kha nula khân mittui a va titla nasa êm! Hnuk ulh ÷euh chungá, “*Kristian ka lo ni zêl tawh ang,*” tia a sawi rî kha bengah a chám reng mai. Enkawltu awm si lo, min ngai a ni tih hriat hliah hliah hmél pua kan han vai liam kha rilru a hrehawm tak zet a ni.

BALUKCHHORA & SORKHI

KHUAH: Champarai aṭangin Balukchhora-ah kan insawn leh a. Namén lovin khua a lum leh thung a.

Mahse kan *Film* chhuah Lal Isua tuarna chuan mi a hnehin a ko khâwm tam hle ṭhin a, mittui tla zawih zawiha an en lai hmél han hmuh chu rilru a khawih hle mai. Hêng khuaahte hian Kohhran páwl dangten tûn hmáin Baptisma an lo chantír tawh hlawm a; mahse enkawl an nih loh avânga Hindu-a lét leh an ni fur hlawm a. Balukchhora-ah hian Lalpan mi 19 lai mai sêng khâwm lehin, Bialtu Pastor Lalrintluanga Raltein Baptisma a chantír leh ta a ni. Lalpa chu fakín awm rawh se.

He hmuna an Biak In tê fel renrawn chhúngah hian kan khat hneh hle a, member-te inpêkna kha an fakawm ngei mai. Ṭhut chilha enkawltu awm lo mah se Biala thawktute zirtírna leh Kraws Sipaite inpêkna a ropui hle. An thawhlâwm khâwnna mawlh mai kha - thing tuk chawpah puan vêt kualin kut ṭhúi ngei mai kha perekin an han kilh kual a; min tihlim kher mai. Intodelh tum Kohhran an nihna kha a ropuiin an

entawn tlâk hle mai. Sorkhi Kohhranhote kha mitthlaah an cham reng mai. Balukchhora nèn hian khaw inzawm deuh an nih avàngin Sorkhi Biak Inah hian Baptisma *programme* buatsaih a ni a, phur takin kan ringtharte hian an rawn pan khâwm a ni.

DOSMILE KHUAH: Balukchhora aţangin Dosmile-ah kan insawn leh a, helai hmuna thawktu NI. Lalhmangaihsangi hi damlohna avànga Mizoram lama a awm lai a ni a. Kan kalna hmasa bera thawktu tûr, inluah tûr a neih loh avànga Dosmile lo enkawltu NI. Vânlalduhsaki hovin hlim takin hun kan hmang ho va. Helai hmuna an quarters hi kawngpui bul, fianrial tak, thenawm tu mah awm lohna a ni a. A luahtute an naupang si; an va han chhel tak êm!

Kan thlen hma zân chiah hian zankhuain a quarters-a luh tumin an lo tibuai a; a riahpui tleirawl nèn hlau thlabâr êm êmin an lo tlaivâr tih kan han hria chu, “Aw, helai hmun hi

chu mipa, pà tak awmna chi a va ni êm âw,” kan ti vawng vawng mai. Mahse pà tak hlîrin an daih zo lova, hmeichhe áwmnêm zâwkin an luah a ngai si. Ngaihtuah a va tithui duh êm! Dosmelah hian nula pakhat leh pavalai tak pakhatin Baptisma an chang leh a; kan Pathian hmangaihna thûk leh ropui hmutute an va lâwm thin êm!

CHOIDOMILE KHUAH: Dosmile aţangin ni 16-ah Choidomile-ah kan insawn pheih leh a. Thawktu nula fel tak mai NI. Nanu-in hlim takin min lo dawngsawng a, a hahdam-thlâk ngawt mai. Helai hmun hi a khirh ve hle a; anmahni ang maia aţawng thiam, NI. Nanui a va han fakawm êm! Compound a vawngfai hle a, thlai hmun pawh a hnúm hlarh mai. Naupangin an ngaina hle a, a quarters chu Tuition pèk nân an hmang nghal a. Naupang an khat tup tup thin. Keini ang, naupang ngaina lutuk lêm lo leh chhawnchhah thiam lo tán chuan harsa tak tûr a ni a. Ani erawh chuan a tlin êm êm a ni. Lalpan helai

hmunah hian ringthar chhúngkaw thum leh nula tleirawl pahnih, an vaiin mi12 min pe leh ta. A va ropui êm!

THAILIK PARA KHUAH: Ni 20- ah Choidomile ațangin Thailik Para-ah kan insawn leh a; a tawp kan kharna tûr khua a ni. Țahnem-ngaih a nat tehlul nèn khuain Țat zai rêng a rêl ta lo; kan thlen zànah ruahhmi tla sêng sêng chungin *Sermon* leh *Film Show* kan ti hrâm a. Ruah lah chu hân hauh lovin zankhuain a tla a. Pathian remruat mak tak a ni zêl mai. Tui chawina a hlain a harsa hle si a, tui chawi ngai hauh lovin min lo chawm a lo ni.

Kan kalna khua hi Reang khua vek a ni a. Zing dâr 5-ah hi chuan lovah an feh hman vek tawh Țhin. Mahse Remruattuin rem a ruat thiam tlat a; Inrinniah tu mah lo lam kal thei an awm ta lo va. An chhun mu te len chilhin Chiang zâwka sawipuina hun kan nei ta hlauh mai. Pathianni zân a lo nih chuan Biak Ina

Baptisma chang duh rawn kal khawm chu mi 15 lai an lo tling leh ta reng mai a. Duh ngawih ngawiha rawn pan khawmtute hmél kha a va mawi êm! Mi 50 aia tlêm lo ringthar kan dil Țhin a. Lalpan mal min sawm a. Mi 53 lai maiin Chhandamtu an thlang a, a va ropui êm!

Kan Outreach chhúng hian Pastor Bial fan *programme* leh *Baptisma programme* hi Țum hnih a in nang a. Choidomile-ah khân Sakramen kan chan ho zawhah “Kraws-ah chuan thisen hlu a awm” tih hla, anmahni Țawnga lehlin chu tui takin kan sa a. Ringthar zinga mi pakhat chu lungchhe êm êmin a Țap hawm hawm mai a; Țap rî azawnga ngaihthlâk hrehawm loh berte zinga mi a ni hial awm e.

Kan hun hman tawpna khua hi han beih zui a châkawm hle. Zan thum chhúng khawchhe kârah in luh chhuah hman loh kan nei nual si a. Pathianin an thinlung a hawng hlein kan hria a, eng tikah emaw chuan an zavaiin ringtu an

la nih ngei kan beisei tlat a ni. An Kohhran member tlangvalte hi eizawna avànga phai lam kal an ni hlawm a, nula tleirawl tak tak pali te khán Kohhran an lo enkawl a ni. An Secretary nula mawlh mai khán rilru a va hneh êm! Baptisma a chantirhin a pain nikhaw hre lo khawpin a sawisa a, mahse Lal Isua hi vawi khat mah a phatsan lo. A va chhuanawm reuh tak êm! Thian an mamawh ngawih ngawih a, ruah súr kárah min lo hmuak a, vawi khat inhmuhna ni mah se Vàn khua leh tui, Kristaa unaute kan nih avàngin min ngaina êm êm kha a va hlu êm!

Hêng kan thawhna hmunah hian thawktu awmna khua chu khaw hnih chiah a ni a, khaw dang pathumte khán enkawltu an mamawh êm êm a ni.

Khaw pakhat, Tripura hnam awmna hmun kan han leng lût zawk bawk a (*Tripura chhúnga chêngte hi 'Tripuri' tih an ni a. Mahse 'Tripura' tia koh bîk, hnam*

pakhat an awm a ni - Editor). Chu khua chuan vawi khat mah Krista hmangaihna chanchin hi an lo la hre ngai hauh lo! Hma lâk châk êm êm chungin, "***Kan luh chuan thawktu/ enkawltu a ngai leh dáwn si a,***" ti vawng vawng chungin kan hnuchhawn ta kha a ni a. Pathianin an khaw pum tán hun tha hawnsak ve ngei se' tih hi kan ÷awngtáina a ni zui ta zêl a ni.

Sorkhi Kohhran Biak In bula kan ringtu duhawm takte kha áw; a chaw chhum tùr khán buhfai a teh chhuah a ÷angin buhfaitham atán a han ÷hâm a. Buhfaia kut nghatin a ÷awngtái thlap a, kan va han tluk lo êm!

Kan hun hman zawngte hi nuam tia han sawi lai tùr a vàng hle mai, mihring lamah chuan. Inthiarna mawlh mai kha a manganthlâk ÷hin (*Thing-kungah leilawn ang deuhvin thing pahnih an kham kai a. Chu chu buaraa zàr hliahin inthiar nán an hmang - Editor*). A

tla tùr changa vawkpui ngûk hruih hruih te, kan zungzûng thu mai pawh min châng khur zêl mai te kha râpawm duh tak a ni. TSR (*Tripura State Rifle*) Camp kha kan pan hrâm ðhin. Chaw ei tui lai taka vawkpui tlai puar lo haw, lu par chhák (*êk kai lua*) mai te kha tawrh a har a, kan tán chuan tawnhriat thar a ni zêl mai. Hêtiang hmun hi kan thawhna a nih avângin Social Worker ðha tak ni tùra kan inzir pah ve reng a va ngai êm!

Kan feh chhuah chhúng hian Ambassa Kohhran ðhalaite chu an Missionary hovin sikulah an riak a; chaw ngheiin hun eng emaw chen Prachar pual hian an lo ðawngðai bawk a ni. ðawngðaipuina kan dawn nasat avâng a ni ang, keini Team pawh la inhre ngai lote ni mah ila, kawng engkimah kan lung a rualin kan inpumkhat ðha êm êm a ni. Kohhranhote ðawngðaipuina avângin

Lalpan ringthar heti zât hi min pêk avângin Lalpa chu fakín awm rawh se.

Rawngbawlpui duh takte u, hetah hma lâkna tùr a la tam hle si a; kan ðhu mai mai dáwn em ni? Sêng khâwm tùr a tam; buh a hmin a, a ngui zo dáwn asin. Hawh u, sêng khâwm sa tal enkawl leh châwm puitling tùr hian ðan i han la lehzual ang u hmiang. Tuin nge zirtír anga, tuin nge enkawl ta ang le? Nangmah kha an mamawh che asin. Nula tlangvalte u, lo pên chhuak zêl teh u.

Kan Lalpa zéma sêng khâwm tùr hian feh chhuak thei lote pawhin ðawngðai leh thilpêkin ðan la zual zêl ila, kan ram suaana hrang hrangin a ei ral phák lohnaah nu leh pa te u, kan tu leh fate i tír chhuak ang u le. Lalpa Pathian kutah i tu, i fa chu pe la, lei malsawmna leh Chatuan hlimnain a thuan dáwn si che a. Amen.

† Joseph Addison-a chuan a thi ðêp tih a hriatin a fahrawn, Lord Warwick-a, nun kawng ðha lo zawh mék chu a bula awm tùrin a chah a. “*Ka fapa, eng ang taka thlamuangin nge Kristiante hi an thih tih entír tùr chein ka chah che a ni e,*” tiin a hrilh

KUM NGA HNUAH MARIGAON-AH ASSAMESE BAPTISMA

*Rev. H. Lalhmingmawia, F/S
Assam Mission Field*

Assam Mission Field hi kum 2008 kum tirah hawn a ni a. *Field* hotute rilruah ruahmanna fel tak siam tura kailawn inchhawp chho òan mah se, mi leh sa la nei mumal lo ta chu a che hlek apiang bawh duhna rilru pawh a lian ve hle òin.

Kum 2010 a lo nih chuan *field headquarters* (Satribari, Ghty)-ah Biak In te dinin inkhawm òan a ni ve ta a (*hetih lai hian hmun òhenkhat chuan inkhawm mumal taka kalpui a lo ni tawh bawh*); mi leh sa erawh kan la nei lêm lo. Hemi kum June thla bâwr vêl aòangin SEVA BHARAT lam aòangin ‘*Guwahati aòanga km 85 vêla hla Marigaon chhehvêlah Muslim òhenkhat, Kristiana inleh duh an awm*’ niin thu kan dawng a, wawi hnih wawi thum lai chu a hmuna kalin kan va zir Chiang nghe nghe.

Marigaon hi Muslim tamna khawpui a ni a, han luh chilh nghal ngawt chu zuamawm lo tak a ni.

Mahse a nghing hmuh tâkah chuan kum 2010 September thla aòang chuan rusum kan thlâk ve òan ta a; Pu H. Lalchhanhima chu *Missionary* hmasa ber atân dah a ni ta a ni. Kum khat chhúng vêlin Pathianin mi leh sa min han pe tak tak a. Mahse Marigaon chhehvêla Muslim hli an la ni. A râlòit avàngin pindan chhúngrilah te baptisma kan inchantir òin a. Thawm lian chhuah ngam si lovin kan hlim hle òin. Mahse boruak a lian chho va, thikthu a chhe chho va, a bihrûk theih loh va; kan lo ualau zo ta. Wawi tam tak vau, vuak, hren, khuahkhirh an lo tuar ta.

Òulna dang avàngin a awmchilhtu *missionary*

chu hmun dangah sawn a ni a, a ram mi (*field worker*) Abul Kalam-a tih loh chu kum khat chhúng vêl chu thawktu kan awm ta lo. Boruak a dai chho va, thikthu chhياتna tham kan ni ta mang lo. Kum khat zet kan awl hnuah, August 2012-ah Tv. H. Lalmuanpuia a lo awm ve leh ta. Baptisma chang chu nei ve leh zeuh thin mah ila, khaw chhehvêla Muslim-te bâk an ni thei lo.

Kum 2014-ah chuan Tv. H. Lalmuanpuia chu Pu V. Rosailovan a rawn thlâk a. Hemi hunah pheih chuan kan lo ral awm titih tawh a, enkawl tûr nei ting siin kan chhuahsan lo mai a ni. A tira Marigaon kan luhchilh chhan kha Muslim zingâ Isua inpuanna bawhzuina a ni ber a. Chutiang reng a nih tâk si lovah chuan Marigaon khaw mi, Assamese baptisma chang tûr kan neih theih hauh lohna chuan rilru a tihrehawm tan a, ngaihtuahna a tikal thui a, hlim a titawi fo. Beiseina lian tak nêna Marigaon lam hawia *field*

kan tanngtai thinna 'âw' kha a lo chau zo va, kan tanngtaina pawh a beidawng 'âw' hial thin.

Chutiang a nih mék lai chuan a khâw mi, Hindu sakhua betu Assamese zingah a nghing kan hmu tan a. Chu chuan a hmuna thawktute tanngtai âw a tisang leh tan ta. Mahse kan tin zâwn ran ran chu a tlawlh leh ta a, kan ngui nghiai mai. Mahse rin lâwk loh lam atangin thâwm a lo awm a, a hmuna awm thawktute leh kan *field worker* Ghana Handique (Ghty)-a ten theihtâwpin an bawh zui a. May ni 8, 2016 a lo thlen meuh chuan Marigaon khaw mi ngei, Assamese, Sankardev-a chi pui ngei mai, Sagar Bhuyan-a leh a nupui Sangeeta Bhuyan-i chuan Rev. R. Vanlalngena kutah baptisma a chang ta. An rual hian Muslim ringthar pathumin baptisma an chang ve bawk.

Hemi ni hi Assam Mission Field *documentary film* atâna *video coverage* kan tih tan ni a ni a.

Marigaon-ah òanin baptisma chang lai *cover*-in bul kan òan thei ta a ni. Sagar Bhuyan-a hian Kristian a lo nih tâkah chuan a sam sei nghual mai chu a mawi tâwka tan a òa e, tiin a lû a mêt ta bawka.

Hetia a ram mi nghet ASSAMESE ngeiin baptisma a chan tâkah chuan kan

thawktute pawh chu an in luah lai neituten chhuak tùrin thu an pe ta a, in dang kan zawn a lo ngai ta hial a ni. Mahse kan beiseina kaih thawhin a awm a, kan òawngòai thu a lo danglam leh thei ta. Lalpan hna a thawka zêl a, Zoram kohhran òawngòai puina kan ngen zêl e.



TUITHUMHNAR HLIMTHLA

*Pro. Pastor Vanlalngeiha,
Tuithumhnar Pastor Bial*

Tuithumhnar Pastor Bial hi Myanmar leh Bangladesh inri-naa awm a ni a, Chhimtuipui lui leh Sekulh luin a luan hual a ni. Lawngtlai District-a awm a ni a, Lawngtlai aòang hian 130 Km. báwr vèla hla a la ni a; 63 sq. km vèla zau a ni. Kawng mumal a awm loh chu sawi loh, a awmchhun a chhiat êm avàngin *motor service* a awm mumal lo va; ke-a Bial fan programme leh Inkhâwmpui hrang hrang neihna hmun a ni.

Sawrkar lamah chuan Lawngtlai Autonomous District Council (LADC) hnuai *Member of District Council* (MDC) òhutchilh a ni a; kohhran inrelbâwlnaah ve thungah chuan Chhimtuipui Presbytery aòangin Chhim-

tâwp Presbytery a lo pian tak avàngin Chhimtâwp Presbytery-a Pastor Bial pali zinga pakhat a lo ni ta a ni.

He Bialah hian Kohhran puitling 4; Branch Church

6; Chhúngkua 309 leh Kohhran member 727 kan awm a ni. Ringlo an la tam mai ni lovin, Buddhist puithiam thutthilhna khua hi kan Bial chhúngah Zochachhuah leh Kaki-chhuah kan nei a. Hma lâk tum mékna khua Hmawngbuchhuahah Buddhist thahnem tham tak, an puithiam leh damdawi thiamte nèn an awm baw a ni.

Tute nge cheng?: A hnam ang zâwng chuan kan chikim khawp mai. Tuithumhnar leh Ngeng-puitlang hi Lai khua; Hmawngbu hi Bâwm (Bom); Tuidangchhuah (Hruitezawl) leh Kaki Vengthar hi Khumi; Kakichhuah hi Rakhai (Zakhai); Lunghauka, Zochachhuah, T. Dumzau Model leh Sabualltang hi Bru khua kan ni a. Chakma, Pang, Kâwl leh Mara hnam a mawi tâwk an awm ve baw. Anmahni thawng hman a ni tho nâ-in Bial huap programme leh eng emaw-ah chuan Mizo thawng kan hmang ber a, a tul dan azirin thawng lettu kan ruai mai thîn.

Inkhâwmpui thenkhatah chuan kan chhangche ve thîn khawp mai; thawng lettu palite awmin Pathian thu mahni thawng theuhvin kan ngaithla ve thîn.

Kohhran Hmathlir:

Kohhran Hmathlir anga kan neih chu - *Kan Bial chhúnga Kohhran tinte sawh ngeh deuh deuh a nih rualin kan ram chhúng ngeia bu rawn khuar, Buddhist sakhua um bova, Kristian la ni ve lote ringtua siam leh ringtu puitling/rawngbáwltu chher chhuah a ni.*

Phâk tâwk leh theih ang tâwk tâwkin Bial chhúng Kohhrante tán Leadership Training te, Counselling Training te, Finance Campaign te, Solfa Training leh Camp te, Retreat leh Crusade te hmangin rawng kan bawl ve thîn a ni. Pathian malsawmna dawngin hma kan sâwn ve zêl a; la sâwn zêl pawh kan inbeisei a ni.

Amaherawhchu, hêng - Sponsored Missionary, Work Camp leh tanpuina

dang dangte kan dawn zêl loh chuan keini Bial naupang leh intodelh lo tak tân chuan thil cho rual loh a ni thung ang.

Khawngaih Rawng-bâwlna: Direct leh Indirect Evangelism rawngbâwlna chi hrang hrang kan hmang ve ðhin. Thuhril rawngbâwlna mai bâkah *film show* hmangin Kristian *film* ðha tak tak te kan chhuah ve ðhin a.

Kan Bial chhúnga *Health Worker* pathumte pawhin rîm takin zân rei pawh sawi thei lovin *current* awm lohna hmun, zan khaw thim hnuaiah *Torch light* leh *Lalín* hmangin nau chharin damlo leh thi chhâwnga awm mai tùrte chhan chhuakin tihdam rawng-bâwlna an kalpui ve mék bawk.

Kan Evangelist pathumte pawhin kawt-thlêrah leh daiah te kalin chhandamna thu leh Pathian hnathawh ropui tak takte an puang chhuak reng a. Tûn hnuaiah mai pawh khan ringlo, ringthararawn inlet 15 lai Baptisma chantîr kan nei a

ni. Chhim Bial Inkaihhruaina dân hnuaiah kan Bialah hian Synod Mission Board Missionary 21 bâkah Sponsored Missionary 25, khawpui kohhran leh Bial chawmten zirtîr rawngbâwlna an kalpui a. Kan zirlai chhuakte aţangin Missionary ni chho tate leh Pathian thu zir thlengin kan nei a ni.

Khawtlang Lam: Tuithumhnar Bial hi Sawrkar *development* thlen phâk mang lohna hmun a ni a; kawngte a chhian tui harsatna hmun zanlai leh zing kâra tui kang nghah ngaihna hmun chu sawi loh, *electric* la luh miah lohna hmun a ni. Ei leh bâr zawn kawngah pawh a tam ber chu lo neia ei zawng an ni nâ-in intodelh chu an la hlat khawp mai. NREGS ni za inhlawhna hi chhúng tin deuh thaw-in intun nun nân an hmang a ni deuh ber.

Sakhaw lam: Kohhran inrelbâwlna leh sakhaw ngaihsak lamah hma sâwn kan la ngai hle. Vânnaih-thlâk takin *committee* leh

inkhâwpui kan ngai pawimawh êm êm a, Kohhran *programme* kan hlutin a hlawhtling fû òin.

Amaherawhchu, kan Upate zingah ngei pawh Pathiannia lo lama riakte leh chawhmeh zawngte kan la awm. Kohhran Hmeichhiate pawh nau pawm bâkah kan inkaih-hruai dânah kan la chhangchhe deuh rih a ni. Kristian Thalai Pâwlte pawh an thawk òha ve viau nâ-in kan la inhrethiam deuh rih a ni e. Kohhran inrelbâwlina hrang hrang kan tihhlawhtlin nual laiin hmun òhenkhatah Pathianni chawhnu inkhâwm leh Sunday School Department kim neih kan la harsat rih a. Kohhran hruaitute zingah pawh Pathianni serh lêm lova zin chhuak an la awm zeuh zeuh a ni.

Hma chu kan sâwn chho ve zêl a, kan rawng-bâwltute inpêkna zârah kohhran dang ațanga kan kohhrana rawn lût ringawt pawh mi 399 lai an ni.

HLIMTHLA:

a) Dawi hlum ve theih

loh: Kakichhuaha kan Missionary, Pu Tuankipzul-a chu a hmaa *motor* enkawla vawkte khârçhâwnga sumdawng òin a ni a. Amaherawhchu, tûna a rawngbâwlina hmun vêla mite sakhaw lama an dinhmun chhe lutuk leh Pathian ngaihsak nachâng an hre lo chuan a thinlung a khawih hle òin a. A ei zawinna hmasa kalsan tawpin hlawh mumal pawh nei mang lovin mahni inchâwmin rawng a bawl ta a. Kâwl òawng thiam mah se a rawngbâwlsakate chuan engah mah a inpêkna leh rawngbâwlina chu an ngaihsak lêm lo va.

Miten a thuhiril an hlut chho òan tih chuan Kakichhuaha an Phungzi (*Buddhist puithiam*) chuan ruahmanna mak leh danglam a lo nei chu niin. Tûk khat chu *Temple* ațang chuan êng hi a rawn chhuak a, chu êng chuan Pu Tuankipzul-a chu a rawn chhun thlu ta tawp mai. Thih ngama khum beta a

awm lai mék chuan Pathian
 âw hriain a dam leh dawn a
 ni tih hriattírna a dawng
 bawk a. A rawn ṭha chho
 leh ta tih chuan an
 puithiam hovin tualchhúng
 mi ṭhenkhatte chuan ei tūr
 siamsakin an rawn pe a.

Amaherawhchu, a
 ṭawngṭainaah Pathianin a ei
 tūrah khan ‘tūr’ an telh a
 ni tih a hriattír a lo ni a. A
 kawmchára an tí tí - “A la
 thi na nge?” tia an sawi chu
 hre vek mah se Pathian
 zarah ‘tūr’ ei lo ta ná nā chu
 a rawn dam chhuak leh ta
 a ni. “Mama chu a daw
 hlum ve theih loh!” an tih
 chuan tūn thlengin rawng-
 bāwlna nung tak a nei ta
 zêl a ni. Pu Tuankipzul-a hi
 Pathian mi hriat, rawng-
 bāwltu nung tak, Chhinga
 Veng Kohhran chāwma
 Kakichhuaha a nupui
 fanaute nēna rawngbāwl
 mék a ni e.

**b) Mahni inchāwm
 Missionary:** Tuidang-
 chhuah hi Chhimtuipui lui
 kianga awm, Khumi leh
 Káwl-ho awmna a ni a.
 Burma ram aṭangin bungrua

eng emaw zât ni tin, kar tin
 mai hian a rawn thleng ṭhin
 a. Pu Lalrinnggheta Ralte chu
 rawngbāwlnaa tuihâlin mi
 ṭhahnemngai tute emaw
 chāwm tūrin Ṭlungvêl aṭangin
 a rawn thleng hlawl mai a.

A làwmmman dawn vete
 chu a beithamin, thla eng
 emaw zah dawn loh a neih
 ṭhin bawk avāngin
 dangpuithu phurin a
 inhlawh ta ṭhin a. Mahni
 inchāwmin Tirhkoh Paulan
 puanin kaiha Europe hmél
 a thlâk danglam ang khán
 Pu Rina chuan Tuidang-
 chhuah, Buddhist Temple
 awmna leh an puithiam
 ṭhutchilh ngeiah chuan
 Pathian hnathawh ropui
 lantírin; tūnah chuan kan
 Bial chhúnga Kohhran
 member tam lamah
 pahnihna a lo ni ta hial a ni.

Pu Rina hi tūnah
 chuan Synod Mission
 Board-ah lut ve tawhin
 Hmawngbu Synod Mission
 Schoolah a thawk mék a ni.
 A nupui fanaute nēn
 Kohhran mipuite thlamuantu
 leh khai dingtu an la ni ta
 reng a ni.

c) Bâwlpu aṭangin

Kohhran Upa: A naupan têt aṭanga a pa hla chham hriaa khaw hrang hrang aṭanga a pa an rawn pan chanchin ngaihnawm taka sawi thei, T. Upa T. Lalnawna hi Bâwlpu fapa a ni a. Amah ngei pawhin ramhmul damdawi leh thil danglam deuh deuh sawi tûr a hre nual a ni. Bangladesh-a an awm lai chuan a pa hi hmun hrang hrang aṭanga an rawn pan, an rawn ber a ni a. Amaherawhchu, sakhaw mumal nei lovin an awm ṭhin a.

Tichuan, Kristianna zûnzâm chuan rawn zêm chhovin ringtu ṭha tak a rawn ni chho ta a. Rawngbâwlnaa mi ṭha-hnemngai tak, Tuithum-hnar Kohhran Tual Upa leh Sunday School Secretary ṭang lai a ni a, Presbytery lo awm leh hmasa bera Upaa nemngheh tûra thlan chhuah a lo ni chho ta ni.

Kan han târ lante hi chu kan Bial hlimthla

ṭhenkhat chauh a ni a, kan Bialah leh Home Mission South hnuai rawngbâwlna hi ṭhahnemngaia au chhuahpui a ṭul ta khawp mai. Kan ram chhúngah ngei ringlo chu sawi loh, an Buddhist puithiam ngeiin naupang ṭhahnem tâwk tak Buddhist puithiam ni zêl tûr an chher mék lai leh Bâwlpu, Sadâwt, Khawhring leh indawina boruakin min bual vêl lai mék hian Chanchin Ṭha theh darh leh puan chhuah a nih theih nân tûna i awm dânah khân i lungawi tak zet em le? China kulh ropui (*Great Wall of China*) a tlúk chhiatna chhan chu chhúng lam aṭanga ei raltu an awm vâng a nih kha maw!

Khaw nge, kan ram Lalpa zawn chhuah ram, Kristian ram 100-a 100 kan tih ṭhin ram hi chhúngril aṭanga Buddhist, Hindu leh Mosolman-in min ei chhiat hma hian kan tih mâkmawh Chanchin Ṭha puan darh hna i thawk zêl ang u.



RAMTHAR FEH

1.

1. **Field Hming** : Tripura Mission Field
2. **Khua** : Sachiapara
3. **Tlawh hun chhúng** : Ni 8-13 June, 2015
4. **Tlawhtu** : Bawngkawn Chhimveng Kohhran
5. **Kal zât** : Mipa – 20; Hmeichhia – 3
6. **Tlawh chhan** : Hnathawh
7. **Hnathawh** : Biak In (12x24 ft) thar sak
8. **Senso** : ₹ 2,16,775/-

9. Làwmawm lam : Sachiapara hi Agartala Bial chhúnga awm a ni a; Bawngkawn Chhimveng Gospel Ministry-in an chàwm, kan Kohhran mi Nl. Lalrinkimi thawhna, Synod Mission Board field chhúnga mi a ni. An khaw hotupa, Pu Mungkurai Debbarma-in ama in bulah a ram, Biak In hmun atán a pe a. A hmun sam fai leh lai zawl chawpin Biak In kan sa a. Vântláng tui pēknaah Brick leh cement-in Tanky kan siamsak bawk. Hna kan thawh lai hian a khaw mipuiten hmuhnawm ti takin min thlir thup thín a, 'Mizote hi Mistíri vek an nih hi' an ti mai thín. Zing khaw en tirh aṅanga tlai thim dawn thleng thawkin ni thum chhúngin kan thawk zo thei a, kan làwm hle. Ni 12.06.2015 khán Bialtu Pastor Lalsanglianin inkhâwm kaihruiin Upa Lalrammawia, Bawngkawn Chhimveng Ramthar Committee Chairman-in Biak In a hawng.

10. Report ṭul dangte: Biak In la din ngai lohna, mitthi an hal ralna hmunah Pathian Biak In a ding ta mai leh a ram (*pass*) pawh kan tihfelsak nghal vek mai hi a ropui kan ti êm êm a ni. Kan hnathawh chhúng zawnga tluang taka thawk theia kan awm leh Pathianin Kohhranhote chhiatna laka min hum tlat mai te hi Pathian hnênah làwmthu kan sawi thín a ni.

Hrangzawna

Bawngkawn Chhimveng Kohhran Ramthar Ziaktu

2.

- 1. Field Hming** : Cachar Tlángram
2. Khua : Telkatta
3. Tlawh hun chhúng : Ni 3 – 6 Nov., 2015
4. Tlawhtu : Sairang Kohhran
5. Kal zât : Mipa – 26; Hmeichhia – 3
6. Tlawh chhan : (A ÷ul ÷ul) Hnathawh
7. Senso zât : ₹ 45,000/-

8. Làwmawm lam : Zing dár 9:00-ah Pastor Lalbiaktluanga Pachuau-in fuihna thu sawia a ÷awngtaí hnuin Biak In kawt aṅangin kan chhuak a, tuang takin dár 4:00 p.m.-ah Telkatta kan thleng a. Thawktuten zanriah ei tùr nèn hmél hlim takin min lo dawngsawng a, kan làwm hle. Kan chàm chhúng zawng harsatna eng mah tâwk lova min véngtu Pathian chungah kan làwm tak meuh meuh a ni.

9. Hnathawh: Work Camp kan neih chhúng hian dár 6:00 a.m. -10:00 a.m. hna kan thawk a; chhunah kan chàwl thung. Tlaihah dár 2:00 aṅang thawk lehin a thawh theih chhúng kan thawk ÷hin. Kan hnathawh hi Biak In kawt leivûng dah zawl te, thawktu quarters sak lai chhúnga leivûng dah khah te leh tuichhunchhuah laih hna te a ni.

10. Report ÷ul dangte: Telkatta Kohhran hi Cachar Kahrawt Pastor Bial chhúnga awm niin Missionary (Evangelist Teacher, Evangelist & Nurse) pakua an awm. A rama mi chêngte hi Kewa hnam an ni a. Kohhran pangngai tak niin Kohhran Upa 4, T. Upa 3, Dan zawhkim 180 leh Kohhran In 66 an awm a ni. Work Camp-a kalte pualin inkhâwmna hun leh thuchah sawina hun min siamsak a, kan làwm hle. Kohhranho thlarau nun pawh a nuam khawp mai.

Tisa leh thlarauvah a kalten hlâwk kan intiin thawktute inpêkna a ropui a, a làwmawm kan ti hle. thawktute leh Kohhranhote i ÷awngtaípui zêl ang u.

Upa K. Lalchhanhima
Sairang Kohhran Ramthar Ziaktu

3.

- 1. Field Hming** : Karbi Anglong
- 2. Khua** : Jengkha
- 3. Tlawh hun chhúng** : Ni 13-16 November, 2015
- 4. Tlawhtu** : Bawngkawn East Kohhran Hmeichhia
- 5. Kal zât** : Mipa – 1; Hmeichhia - 22
- 6. Tlawh chhan** : Field tlawh
- 7. Senso** : ₹ 62,400/-

8. Lawmna lam: Presbyterian Mission School, Jengkha-a thawktuten, Headmaster hovin min lo dawngsawng a, Staff-te quarters-ah insemín kan thleng dárh a. Kan thlen inten min duat a, a nuam kan ti hle a ni. Kan chàm chhúngin Herlongsora Kohhranin Inrinni zàn ațanga Pathianni chawhnu thleng hun min kian a. Ni 14-ah Headmaster leh staff-te kaihhruaina hnuainain kan chhehvêla Kohhran leh Preaching station te kan tlawh thei a. Pathianni zànah Headmaster quarters-ah thawktute nèn inpâwl hona leh zai hona hun hlimawm tak kan nei a, a lâwmawm kan ti hle.

9. Report țul dangte: Karbi Anglong Mission Field, Jengkha-a thawktute inpêkna leh an thawhrimna a ropui kan ti hle. A ram mite hnên ațang pawhin harsatna an tâwk nasa hle a, Kristiana inpe tûr chuan an leilet te, an in leh lo te leh an chhúng te an chan a ngai a. Chuti chung chung pawhin Isua thlang zâwk an la awm hi a ropui kan tiin țawngțaipui an ngai tak zet zet a ni. Ramthar field tlawh theia hriselna min petu leh min hruai thlengtu kan Pathian chu fakín awm rawh se.

Lalmalsawmi Sailo

Bawngkawn East Kohhran Hmeichhe Ziaktu

4.

- 1. Field Hming** : Cachar tláng ram
- 2. Khua** : Pipla, Manikbond bial
- 3. Tlawh hun chhúng** : Ni 24-28 November, 2015
- 4. Tlawhtu** : Serchhip Kawnpui Kohhran

- 5. Kal zât** : Mipa – 13; Hmeichhia – 1
6. Tlawh chhan : Hnathawh
7. Hnathawh : Thawktu Qtrs. (36x24ft) sak chhunzawm
8. Senso zât : ₹ 44,060/-

9. Làwmawm lam : Thawktute leh Kohhranhote min lo làwm thiamin min tawiwawm tha em em a, kan chàm chhúngin inkhâwmna tha tak kan nei thei zel a ni. Nilai zànah Pu Lalremmawia, an zínga Missionary hmasa berin anmahni Ranglong tawngin thu a sawi a. Inrinni zànah an Missionary H. Vanlalmalsawmkima pa, Pu H. Thangtluangan thu sawiin, Pathianni chawhnu leh zànah Upa K. Chawilianan thu a sawi thung. Kohhranhote nèn thla te la hovin hun hlimawm tak hman a ni.

10. Report tul dang: Ni 24-28 chhúng chu zíng dár 6:00 vèl atangin khaw en chhúng thawh a ni. Rangva chih leh a tuidawn túrte siam fel a ni a, *tile (A/C Sheet)* hmangin ceiling siam zawh a nih bâkah tûkverh leh *ventilation frame* te vuah vek a ni bawk. A chhuat laih hniam ngai pawh lai-in, kan tírua nghal a ni. A chhuat *concrete* chhun leh a bang *plaster* loh a la nih avàngin *electric wiring* leh pindan bang a la tih theih loh va. Innghah chi a nih si loh avàngin lungsi zân lovin kan hawsan ta a ni. Biak In sak tanpui nán hian ‘ 20,000/- kan hlan ve a ni.

Ni 29 (Pathianni) Chawhma inkhâwm banah Missionary H. Malsawmkima nupui thawhna Bru khua Medili-ah kan leng a. Kohhran hrang hrangten an lo sak Biak In leh Quarters te kan tlawh nghal bawk. Thawktu pakhat, Champhai nulain min lo mikhual a, khua min fanpui a. Khaw hmun nuam tak, in 130 lai awmnaah ringtu in 5 chauh an la awm a; kan nulate pasalthatzia kan hmuhin rilru a dek hle mai.

Lalzuiliana

Serchhip Kawnpui Kohhran Ramthar Committee Ziaktu

5.

- 1. Field Hming** : Barak Area
- 2. Bial** : Zaita Pastor Bial
- 3. Tlawh hun chhúng** : Ni 26-29 Feb, 2016
- 4. Tlawhtu** : Ramhlun Vengthar Kohhran Hmeichhia
- 5. Kal zât** : Hmeichhia - 14
- 6. Tlawhchhan** : Bial chhúng tlawh
- 7. Senso zât** : ₹ 68,525/-

8. Lâwmawm lam : Ni 26 (Zirtawpni) zing dár 7:00-ah Aizawl kan chhuahsan a; tuang taka kalin Thinghlunah Bialtu Pastor Vanlalzualan min lo hmuak a. Tlai dár 5:00 vélah Zaita kan thleng a, Kohhranhovin zanriah tui tak min lo buatsaihsak a, kan lâwm hle.

Ni 27 (Inrinni)-ah Bial chhúng Kohhran paruk kan tlawh a. Ni 28 (Pathianni)-ah kan insem dárh a, Bial chhúng Kohhran hrang hrangah Pathian thuchah sawiin thilpék kan hlan hlawm a ni. Kohhranhote leh thawktute nèn Ramthar Field-ah ngei inpáwlin hun kan hmang ho va, kan lâwm hle. Bial chhúnga Preaching Station leh Branch Church, kan thlen phâk lohte hnêna kan thilpék tûr pawh Bialtu Pastor hnênah kan hlan a ni.

Ni 29 (Thawhṭanni)-ah Zaita aṭangin kan haw a. Bialtu Pastor-in Katlichera (*Winchester hriat rengna hmun*) thleng min thlah a; kan ṭawngṭai rual zawhah kan inṭhen ta a ni.

9. Report ṭul dangte :

1) Zaita Kohhran hi kum 1965-ah dín a ni a. A ram mite kutah hian Kohhran hi dah tawhin an ke-a dintír ve hi a hun tawh nia an hriat thu thawktute hnên aṭangin kan dawng.

2) Sikul ṭha dinsak erawh a ṭul hle. Lehkha thiam an lo pun zêl chuan Kohhran tán a ṭangkai hle dawn niin thawktute chuan an ngai a ni.

3) Bial chhúngah hian ringlo, inthawIna la hlan ṭhin eng emaw zât an la awm avàngin ṭan lâk erawh a la ngai hle.

4) Craft Centre pakhat a awm a, Craft Teacher pakhat a awm. Hetah hian puanthui khawl 10 a awm. Kum tin mi 10-in puanthui an zir thin.

5) Monapi Preaching Station-ah hian rilru khawih tak mai a awm a. Thawktu nula pakhat chauh a awm a, Biak Ina lawi tûr an awm mumal tawh lo a ni.

6) Zaithe Bial Kohhranten thil pawimawh tak min chah a. Khu laia a ram mite khu Mizoramah 'awmpui' atân kan nei thin a. Chûnghote chu sum leh pai khâwl dante lo zirtir tûrin min chah a. Chumi rual chuan, "*In inah an rawn awm a. In nunah hmuh tûr an hre lo thin a. Chuwàngin, hetah hian enkawl an har a ni. Awmpuite enkawl chungchangah Krista hmél lo tilang thin tûrin kan duh che a ni,*" tiin min chah a ni.

P.C. Lalrintluangi

Ramhlun Vengthar Kohhran Hmeichhe Ziaktu

6.

- 1. Field Hming** : Home Mission South
- 2. Khua** : Diblibagh
- 3. Tlawh hun chhúng** : Ni 8-12 March, 2016
- 4. Tlawhtu** : Tachhip Kohhran Pavalai pawl
- 5. Kal zât** : Mipa-13
- 6. Tlawhchhan** : Hnathawh
- 7. Hnathawh** : Sikul sak
- 8. Senso zât** : ₹ 21,200/-

9. Làwmawm lam : Thawktute leh Kohhranhoten hlim tak leh phur takin min lo dawngsawng a. Zàn mut hmaa thlen tum kha a tûk zing dár 5:30-ah kan thleng thei chauh chungin chaw tui tak nèn min lo hmuak thei a ni. Kan thawh chhúng zawngin ei rawngbàwl hna min thawhsak vek a, kan hnathawhnaah an rawn tel thei reng bawk si a ni. Zingah dár 6:00 ațanga thawkin khaw en chhúng kan thawk thin a. Zàn lamah erawh chuan thawktuten Inkhâwm leh Inpâwlkhâwm an rawt avàngin hna thawk lovin hnathawh thawmhaw nèn kan inkhâwm thin. Sikul (110x18 ft, RCC-a rel sa) chu thingzaiin kan sak chhunzawm a. A hmun a

âwih a, a ban kâr a zau bawk a. Chuvàngin, a bante kan phun belh a, a chhuat pawh eng emaw chen kan rem phui a; a bangrel kan vuah hman bâkah chih theihin a chung kan zo thei bawk a, kan lâwm hle.

10. Report ÷ul dangte: Diblibagh hi Tlabung ațanga hmar lam 8 Km vêla hla (Tachhip ațanga 250 Km vêl)-a awm a ni a. In 400 vêl a awm a; Chakma hlang, Buddhist sakhaw vuantute an ni. Mizoram chhúng ngeia ringlo khua a lo awm reng mai hi a mak kan ti hle. Kan Synod-in hma lâkna atána a hmang hi a ropui kan ti hle. Tûnah hian Kohhran member 145 leh Dan zawhkim 60 an ni. Thawktute leh Kohhranhoten theih tâwp chhuahin ringlote hi Lal Isua hnêna hruai tûrin řan an la a, sikul řa tak neiin zirlai pawh 100 chuang lai an ni.

P.C. Lalrosiama

Tachhip Kohhran Pavalai Ziaktu

7.

1. **Field Hming** : Home Mission North
2. **Khua** : Mission Development Training Centre
3. **Tlawh hun chhúng** : Ni 15 March, 2016
4. **Tlawhtu** : Dawrpui Vengthar Kohhran
5. **Kal zât** : Mi 29
6. **Tlawh chhan** : Chanchin řa thlen ni denchhana a hmuna tlawh
7. **Senso** : Kohhran sum awm sa hmang lovin a kalten kan thawh khâwm

8. Lâwmawm lam : Thawktute inpêkna a ropui kan ti. An inlêngte min lo chiauw-au dânah kan lâwm hle a ni.

9. Report ÷ul dangte : MDTC, Bualpui hi a hmun a zauvin a rem hle. Nasa zâwka hma lâk nân a remchang hlein kan hria. Tûn dinhmunah pawh hian hei aia changtlung deuh zâwk hian kalpui nghal mai theih niin a lang.

Zothansanga

Dawrpui Vengthar Kohhran Ramthar Committee Ziaktu

8.

- 1. Field Hming** : Home Mission South
- 2. Khua** : Sabualtláng
- 3. Tlawh hun chhúng** : Ni 21-26 March, 2016
- 4. Tlawhtu** : Mission Vengthlang Kohhran
- 5. Kal zât** : Mipa- 24;
- 6. Tlawhchhan** : Hnathawh
- 7. Hnathawh** : Biak In (40x30 ft) sak
- 8. Senso zât** : ₹ 1,85,099/-

9. Làwmawm lam : Tluang takin hna kan thawk thei a, Biak In ka sa zo t̄ep a ni. Tin, Kohhranhote an phur a, kan Work Camp min pui t̄ha hle.

10. Làwmawm lo lam : A awmna khua a hla hle a, motor hmannaah sum sen a tam duh deuh. Tui a harsa a, hnathawh a harsat pah.

11. Report t̄ul dangte : Sabualtláng Kohhran hi kumin kum tira ding a ni a. In 40 chuang, member 200 chuang an ni. Bru hnam hlang niin inkhâwm an taima tláng hle. Inkhâwm dân leh Kohhran kalphung erawh chu zirt̄ir an la mamawh hle. Evangelist-in awm chilh thei se hma an sâwn chak viau a beiseiawm hle.

K. Lalremruata

Mission Vengthlang Kohhran Ramthar Committe Ziaktu

9.

- 1. Field Hming** : Barak Area
- 2. Khua** : Kalahor Mohanpur
- 3. Tlawh hun chhúng** : Ni 23-25 March 2016
- 4. Tlawhtu** : Ramhlun Vengthlang Kohhran
- 5. Kal zât** : Mipa-18, Hmeichhia – 5
- 6. Tlawh chhan** : Hnathawh leh Good Friday hmanpui
- 7. Hnathawh** : Biak In choka bang bel
- 8. Senso** : ₹ 46,841/-

9. Làwmawm lam : Kalahor Mohanpur hi Cachar District chhúnga awm, Bagha Pastor Bial chhúnga awm a ni a. Missionary - Nurse 1, Evangelist 1, Local Worker 2 leh Kraws Sipai 3 an awm a, Kohhran member 26 an awm mek bawk. Ni 23 (Nilaini) dár 1:30-ah tluang takin Mohanpur hi kan thleng a, kan missionary-ten tha taka min lo dawngsawngin kan hnathawh türte fel takin min lo ruahmansak diam a. Kan thlen veleh Biak Inah lûtin ÷awngñairualna hun kan hmang a. Kan awm dân türte min hrilhin, kaihhruaina fel tak min siamsak a, a làwmawm kan ti hle. Kan thlen ni añangin harsatna awm lovin kan hnathawh türte kan thawk ÷an nghal a, kan hnathawh chhúng zawngin kan missionary-ten phur takin min ÷awiawm reng ÷hin. Good Friday Programme pawh tluang takin kan hmang thei a ni. Min ÷awngñaipuitu, Kohhranho leh min hruaitu Pathian chungah làwmthu kan sawi tak meuh a ni.

10. Report ÷ul dangte: Kalahor Mohanpur-ah hian tûn hmain Kristian 100 báwr vél an lo awm tawh ÷hin a. Hêng ringtute hi an sakhaw ngaiyah an lét leh deuh vek avàngin rawngbawl a harsain ringtu thar siam pawh a harsa hle. An khawtláng hruaituten hnam anga Kristiana an inlet a nih loh chuan mi mal Kristiana inleh an phal tlat lo! Kristiana inlette chu an tuithlâr mai ÷hin. Chuvàngin, ringthar neih belh a harsa zual a, ÷awngñaipui an mamawh tak zet a ni.

Kan Kohhran hmingin Mohanpur Kohhran hnênah hian Toilet siamna tür Synod Ramthar Board kal tlangin ₹ 6,000/- kan pe a. Kohhranin a ÷ul anga a hman türin ₹ 5,000/- leh kan bungraw ken ÷henkhat kan hlan bawk. Kohhranin mamawh a la ngahin thawktu leh ringtu an tlêm bawk nèn ÷anpui leh ÷awngñaipuina an mamawh hle niin kan hria.

J. Auma

Ramhlun Venqthlang Kohhran Ramthar Committee Ziaktu

“...ama làwmzáwng atâna tih tum tûr leh bei tûra nangmahnia thawktu chu Pathian a ni si a,”

(Phil 2:13).

SMB RINGTHAR 2016

Sl. No	Field	April thleng	May thla	May thleng
1	Arunachal East	26		26
2	Arunachal North	40	35	75
3	Arunachal West	99	11	110
4	Assam	14	15	29
5	Barak	135	29	164
6	Delhi	13	2	15
7	Jharkhand	440	65	505
8	Karbi Anglong	45	13	58
9	Home Mission North	30	15	45
10	Home Mission South	154		154
11	Kolkata	267	65	332
12	Lucknow	76	33	109
13	Nepal	82	9	91
14	Odisha			0
15	Patna	71	33	104
16	Siliguri	44	21	65
17	Tripura	427	134	561
18	Masihi Sangati	488	87	575
TOTAL		2451	567	3018

SYNOD MISSION BOARD HNUAIA HSLC EXAM RESULT, 2016

Sl. No	Name of Schools	Field	Exam sat	Distn.	Star				Pass sat	Compartmental	Fail sat	Letter belh khavon	Pass %
					I	I	II	III					
1	Oriental H/S, Silchar	Barak	40	5	7	25	3	40			94	100%	
2	Rowlands Memorial H/S	Barak	61	18	27	15	1	61			223	100%	
3	Winchester School	Cachar	9			1	7	8		1		88.88%	
4	Calvary H/S, Tuidu	Tripura	38			11	26	37		1		97.37%	
5	Bethlehem English School	Tripura	34			3	19	12	34			100%	
6	Jeruel English School, Lakia	Aru 'E'	25		1	5	11	2	19		6	76%	
7	Tangsa Model School, Khasan	Aru 'E'	23			12	10		22	1		95.65%	
8	St Peter H/S, Madhuripathar	Aru 'W'	32		1	18	11	1	31		1	96.87%	
9	J/M High School, Jonai	Aru 'W'	8			6	2		8			100%	
10	St.Paul H/S, Bairabkunda.	Assam	11			3	5	2	10		1	90.90%	
11	PMS Diphu	Karbi	30			8	21	1	30			100%	
12	PMS Hamren	Karbi	34			6	17	7	30		4	88.23%	
13	PMS Koilamati	Karbi	12			11	1		12			100%	
14	Salem Boarding School	H/M 'N'	20				2	10	12		8	60%	
15	SHMS Tlabung	H/M 'S'	7			1	1	3	5	1	1	71.42%	
16	SHMS Bungtiang 'S'	H/M 'S'	8				2	5	7		1	87.50%	
TOTAL			392	23	36	114	124	69	366	2	24	328	*85.71%

Note: 1) Rowlands Memorial High School atangin Fahim Coudhury an Mathematics-ah 100 %
leh Rajashree Das in General Science-ah 100% an hmu.

*A pumpui Pass Percentage

Postal Regn. No MZR/46/2015-2017

RNI Regn. No. 40889/88

FIELD SECRETARY/PASTOR ORIENTATION TRAINING

Ni 4-13 May, 2016



Sitting : Rev. Malsawdawngliana, Rev. Lalhmuchhuaka, Rev. R. Lalrinsanga, Rev. Dr. K. Lalrindima (MTC Principal),
Rev. Lalramliana Pachuau (Senior E/S), Rev. Lalramdinthara Colner, Rev. R. Lalrosisama, Rev. C. Lalsanglura
Standing : Rev. V. Lalpakzuala, Rev. F. Lalrammawia, Rev. Lalawmawia, Rev. F.H. Kapkhuma, Rev. P. Lalhlanhlua,
Rev. K. Zoremthanga, Rev. H.D. Ramngathawma, Rev. Laldawngliana, Rev. C. Lalohhuanliana

If not delivered please return to:

The Manager
Ramthar Chanchinbu
Synod Office, Aizawl, Mizoram,
India. Pin - 796001

To

Published by Rev. K. Lalrinmawia and Printed at the Synod Press, Aizawl on
behalf of Ramthar Association, Aizawl, Mizoram. Copies- 30,500